

# MEJE PO CARTE SANTIAGO TATINA, POMONAE JESUCRISTO PEJUME COWŪNTSIWI TATINATSI

---

Meje yabara poxonaē Santiago tamropata pitaba xua tatina pomonaetha pomonaē pejume cowŭntsiwi pomonaē xua tajŭ jinompa

**1** <sup>1</sup>Xan, Santiago ponxaein Nacom amanaya pia petanacuichin tatsin irŭ Jesucristo pon jiwi Pecanamataxeinaein amanaya pia petanacuichin tatsinno. Paca jacobatsi pomonaē Israel pia saineiwi tatsi pam, pon caena bayatha tŭpa. Israel doce po pexantobe xeina, pomonaē caena bayatha werapa.

Paxam barapo doce po bicheito matabŭxŭmonaēbe pia sainei jiwi tatsi pam, pomonaē pam xua anoxuae tajŭ nacayayatsiya pajinompame daxita nacuantha xua painya pepa nacua weya.

Meje yabara xua po peyaputae coyene Nacom pia peyaputae coyenewa tatsi

<sup>2</sup>Tamonaē pam pomonaē irŭ painya nejume cowŭntsi jiwi pam Cristo, bewa jŭntŭ coyene weiweinaya pajinompaem poxonaē bequein pacata ayapube tsaibi tsane ichauxi. <sup>3</sup>Poxonaē pacata ayapube tsouneibi ichauxi ichitha beitemaya awiya ayapusŭya pajume cocowŭntaponame, bapoxonaē payaputaneme xua paantŭyapusŭya amanayabame pocotsiwa xua paca atene exana. <sup>4</sup>Bara saya beitemaya payabara cui copare barapo coyene xua ayapusŭya jume cocowŭntapona paca necana exanaenexa beya poxonaē painya jŭntŭ coyene Nacom petsita xanepanaenexatsi. Bapoxonaē painya jŭntŭ coyeneintha jopa paxeinaem tsane pocotsiwa pacata seica. <sup>5</sup>Icha caein paxam jiwana pam taseicatsi peyaputae coyene xua jopa yaputaeyo pocotsiwa Nacom ichichipa bapon bewa Nacomtha tsipaebina xua pecatsinexatsi peyaputae coyene pocotsiwa bapon ichichipa. Nacom amanaya catsina nawita barapo peyaputae coyene. Matautano Nacom jopa aenaē-aeneya itawetsiyo

poxonae cata. <sup>6</sup>Daichitha jame bewa jume cowuntsiya pawucaename. Matauta jopa bubujeya pawucaeinde Nacomtha. Tsipei pon bubujeya wuca Nacomtha, bapon ichawa beya tamropata nanta xeinapenteiba icha be pocotsi coyene juta ichi poxonae ba maratsaca joibo ichawa beya caya tsaibi icha muxunene beya. <sup>7</sup>Pon barapocotsi coyeneya exana, Nacom ba jopa catsiyo bapocotsi jitontha, tsipei jopa jume cowuntsiya wucaeyo Nacom pon jiwi Pecanamataxeinaein. <sup>8</sup>Bapon jopa xeinaeyo pocotsiwa Nacom cata tsipei bapon anoxuae caewa yabara nanta xeina. Baya equeicha ichawa yabara nanta xeina. Jopa itacupaetsi xua xanepanaya pepoponaewa.

<sup>9</sup>Pon xua Jesucristo pejume cowuntsin, bapon bequein saya tsiwiyo copei xeina, bapon bewa juntemiya juntu coyene weiweinaeya poponaena tsipei bapon Nacom peitabaratha ainya cui penaexanaein. <sup>10-11</sup>Matautano pon copiya copei pexeinaein pontha pon bequein Nacom cui yabara copata xua bapon peacopeibin naexana, bewa juntema poponaena pejume cowuntsixae Nacom. Poxonae bapon tupaena, bapana jopa cuenta tupa po coyene xua bapon pejume cowuntsiwa. Ichitha icha bapon jopa jume cowuntsiyo copei pexeinaexae, bapon saya caeto nacuita ducuaenaebiya bapoxonae cuenta tupa copei poxonae nacuita ducuaenaebiya. Barapo coyene icha be pocotsi juta coyeneya ichi xua pentono. Bara caeto matono weiweinaeya umena. Cotacaya xometo ecoina yawano atsa bichocono, naepanaewan tsaquiwa, pentononno othopeica. Weraweraca xua matono itupana. Pon copei pexeinaein bapon tupaena, saya weraweracaena icha pentono ichi xua weraweraca.

### **Meje yabara poxonae jiwi pemuxujainyabiwatsi xua abe peexanaewa tsane**

<sup>12</sup>Nacom jujuta pomonaetha pomonae pejume cowuntsiwichi pia yaputaetsi icha barapomonae xaniwaicha antobetsi. Pon xua acuiyapusya jume cowuntsiya popona poxonae bara bequein Nacom juntu coyene jujuta, jame bapon juntu coyene weiweinaeya popona. Poxonae yapucaewa xua bapon juntu coyene jujutatsi bapoxonae Nacom yabara wuna muxu dutsina xua bexa bapon Nacom pia nacua beicha peajuntucoyenyapuswatha ponaena. Barapo peyabara tsiwuna muxu dutsiwa Nacom cata pomonaetha pomonae peantobewixaetsi. <sup>13</sup>Poxonae ichun matowa juntu coyene jujutatsi xua abe peexanaenexa, bapon jopa bewa nanta xeinae xua metha baxua Nacom cana exana bapontha. Tsipei Nacom bapana jopa jichipae xua abe peexanaewa tsane. Matauta Nacom ichamonaetha jopa bapana cana exanaeyo xua pejuntu coyene jujutsiwa xua barapomonae abe peexanaewa tsane. <sup>14</sup>Apara jame nama pon juntu coyene jujutatsi abe peexanaenexa, bapon copiya pejuntu coyenetha nanta xeinaeya popona xua abe peexanaenexa. Bapoxonae poxonae xaniwaicha juntu coyene jujutatsi xua abe peexanaenexa bara bapon

exana xua abe exana. <sup>15</sup>Pon xua abe exana bapon exana po peabe exanae cuiru coyene copiya yabara nanta xeina. Icha bapon awiya abe exana ducuaenaebiya matapainya tupa abe peexanae cuiru coyene peexanaexae bichocono.

<sup>16</sup>Tamonae pam paxam pomonae tapaca caantobewichi pam. Jopa painya coutha pananta xeinaeinde xua pajam: “Nacom nemuxujainyaba xua abe taexanaewa tsane”, jopa pajande. <sup>17</sup>Daxita xua wuna, saya meisa baxuan Nacom nacata itorobica peitaboco wetsica. Bapon Nacom exanaduba daxitan xua pocotsiwa yonoyonojei tsurubenae peitabocotha. Nacom jopa bapana ichawa beya pepaebiya exanaein. Bapon peyapenthiya jinaein mataqueitha yawa merawithano. Jopa exanaeyo icha barapo pecoichan ichi xua pentha tsaibi yawa quirei tsaibi. Dapon aibi pon itacupatsi xua itorobatsi Nacom xua icha coyeneya peexanaewa xua pocotsiwa bapon pia coya ichichipa exana. <sup>18</sup>Poxoru saya Nacom pia coutha ichichipa daxota naca cata peantuyapuswa po peantuyapuswa ataya tsiteca. Baxua naca cata poxona jume cowuntsiya jume tainchi Nacom pia pexainyei jume diwesi tatsi. Poxona Nacom baxua naca cana exana bara waxainchi piamonae jiwi tatsichi xua waxainchi ichamonae toxechiya jume cowuntatsi. Xua copiya wajume cowuntsixae, Nacom naca cana exana xua pomonaetsi pomonae wajuntu coyene xanepanae jiwichi Nacom nexa. Daxota Nacom tsita be peainya cui jiwichi beyacaincha ichamonae.

### **Meje yabara pomonae xaniyeya pepa pejume cowuntsiwi Nacom**

<sup>19</sup>Tamonae pam pomonae bichocono tapaca caantobe jiwichi pam pacayabara nanta xeinare barapo diwesi xua jeye: Daxita paxam bewa pewunaeya pana najuntu coyene wunaeteibim painya nenamnaewateibinexa Nacom Pejume Diwesi. Jopa bewa paxainxainyam xua painya cueicueijeinexa barapo diwese ichamonaetha poxona cataunxuae jopa paexanaem pocotsiwa barapo diwesi itoroba. Yawa jopa bichocono anaepanaya pacueicueijande. <sup>20</sup>Tsipei pon anaepana, Nacom jopa taexanaetsi pexeyina coyene po coyene xua Nacom tsita xanepanatsi. <sup>21</sup>Bara pabarapende po coyene abe peexanae cuiru coyene pocotsiwa pananta xeiname, xuano xua pocotsiwa ichamonaetha pata exaname. Matautano pana cui barapende po peabe exanae cuiru coyene bichocono nawita pocotsiwa ichamonaetha pata exaname. Matautano painya juntu coyeneintha ita ururaquiya pajume cowunde Nacom pia pexainyei jume diwesi tatsi. Tsipei barapo pexainyei jume diwesi xeina peayapuswa xua paca cana exana xua pajuntu coyene panenebiyam abe painya neexanae cuiru coyenein weya.

<sup>22</sup>Itapeta paexande, pocotsiwa Nacom Pejume Diwesitha paeba. Jopa metha bepa saya pajume taemtsipae. Tsipei paxam painya coutha pana

namuxuitorobeibichipame icha jopa paexaneibim pocotsiwa xua pajume taibame. <sup>23</sup>Pon xua saya jume tane Nacom Pejume Diwesi yawa jopa exanaeyo pocotsiwa Nacom paeba, bapon be pocotsi jiton tsabocototha nayaitane. <sup>24</sup>Bara nayaitane. Poxonae bapon pona caena bapon yacuinaya naitabara itaxananaya. <sup>25</sup>Nacom Pejume Diwesi bichocono xanepana. Barapo peitorobi diwesi naca jüntu coyene capanepa exana abe waexanae cuiru coyene weya. Ichitha pon jopa jüntemainaeyo xua pocotsiwa Nacom Pejume Diwesitha paeba, xuano xanepanaya exana ducuaanaebiya pocotsiwa barapo diwesi itoroba, bapon jüntu coyene weiweina xua pocotsiwa peexanaexae.

<sup>26</sup>Ichha pebin nanta xeina xua daxita jume cowuntsiya exana Nacom nexa, xua daichitha jopa naebato yatacutsiyo poxonae ichamonae catsawiya yabara paebatsi, bapon pia coutha namuxuitoroba. Matautano pocotsiwa jume cowuntsiya exanapona Nacom nexa saya pejumexaei. <sup>27</sup>Pomonae xainyeya pepa pejume cowuntsiwi Nacom, barapomonae jopa abe exanaeyo Nacom peitabaratha, pon Waxa. Pomonae xanepanaya exana bewa iche: Bewa yawenae pomonae peacoibi jiwi, yawa bewa yawenaeno powaxi pecuenta werapaewaxichi piseurixi. Matauta jopa bewa exanae pocotsi coyene exana pomonae jopa pejume cowuntsiwi Nacom.

### Meje yabara xua poxonae jiwi bewa daxita tsita najupaetsi

**2** <sup>1</sup>Tamonae pam, pomonae iru painya nejume cowuntsixae Jesucristo pon Wanacanamateaxinaein. Bapon Jesucristo pon bichocono pejüntu coyene xanepanaein. Jopa bewa paexanaem painya xantha painya nejume cowuntsixae xua ichun bichocono peainya cuin wnae penaexanaeinxae beyacaincha ichun xua jopa wnae penaexanaeinxae xua daxota bapon catsapin pacana exaname. <sup>2</sup>Ichacuitha metha be pocotsi coyeneya tsipae, xua meje: Metha poxonae paxam panacaetutsipame, bapoxonae iruru pebinbe patopaetsipabe. Metha baponbe joniyaetsipabe baxota. Ichun nacobesi xataba aniyon pocotsiwan daedaena. Matautano paparuwa nama xatata xua mu daedaena. Nama iru ichun acopeibi, nama dapon saya pia penama xatatsiwa taabetsi. <sup>3</sup>Metha pon copei pexeinaein pantenta weyataeya wabichipame. Metha pajam tsipaem bapontha: “Xote ecare ichaxota pexeinya peecaewatha”, pajam tsipaem. Ichitha nama pontha acopeibi, jopa pantenta weyataeya wabichipaem. Bapontha pajam tsipae: “Bara beuncuiyama, ichacuitha bara saya iratha ecare”, pajam tsipaem. <sup>4</sup>Ichha metha baxua paexanaetsipame bapoxonae abeya pananta xeinaetsipame xua jiwi jopa najupaeyo. Bapoxonae paxam pana nacana exaname be pomonae jiwi painya neyabara paebi jiwi pam xua penatsicuentsiwa yabara xua abe peexanaexae.

<sup>5</sup>Tamonae pam pomonae iru painya nejume cowuntsixae Jesucristo, bichocono paca antobetsi. Incane pajume taema, xuaje: Nacom itapeta pomonae peacopeibiwi xua barapomonae bichocono pejume cowuntsinexa. Matautano Nacom catsibina barapomonaetha pocotsiwa bayatha juntana jeba pia peitorobi nacuatheicha pia peantobewixaetsi. <sup>6</sup>Ichitha nama jopa paweyataem pon barapo peacopeibin. ¿Eta xua metha baxua paraichim? Pomonae ba copei pexeinaewi pomonae paweyataneme barapomonae ba daunweya paca itoroba nama. Matautano barapomonae ba pentacaponae peitabaratha paca capona xua abeya pia paca necayabara paebinexa. <sup>7</sup>Barapomonae pomonae copei pexeinaewi apara Jesucristo abe yabara paebatsi, pontha pon waxainchi wajume cowunta dubenanaebiyaexaetsi, naca jei, “Cristobarumonae”, naca jei.

<sup>8</sup>Icha ichichipa paexaname Nacom peitorobi jume coyenewa, moya pejume coya paexande xua Nacom Pejume Diwesitha jeye: “Paantobeinde ichamonae, pomonae painya nepaca tsicuarabu enaewi icha paichim xua painya coutha pana naantobem”, jei xua barapo diwesitha. Moya bara beta paexanaename. <sup>9</sup>Poxonae ichamonae ainya cui pacana exaname xua beyacaincha ichamonae, bapoxonae paxam apara abe paexaname. Matautano apara paxam pomonae abe painya neexanaewi, tsipei jopa paexanaem pocotsiwa Nacom penajume caitorobi coyenewatha paeba. <sup>10</sup>Icha ichun jume jejei xua peexanaewa tsane pocotsiwa Nacom penajume caitorobi coyenewatha paeba, daichitha bara caewiyo seicanaya xua peexanaewa tsane, bapon Nacom tsita natsicuentatsi xua abe peexanaexae. Bara bequein saya caewiyo seicanaya, barapara Nacom tane xua daxita tsita abetsi. <sup>11</sup>Nacom namchi: “Jopa panasi cui wainmeinchinde poxonae jitha painya neenaewatha”, jei Nacom. Yawa namchino: “Jopa bexubinde ichun”, jei Nacom. Ichitha icha bequein jopa panasi cui wainmeinchim, daichitha pabexubame ichun baraxua be poxonae daxita abe pacayabara exaname Nacom penajume caitorobi coyenewa. <sup>12</sup>Paxam bewa beta xanapanaya papaebim. Matautano bewa beta pajinompae. Tsipei bexa tsane Nacom paca yabara paebina painya nenatsicuentasiwa abe painya neexanaexae bapontha. Paxam jopa payabara jume cuiya exanaem pocotsiwa Nacom itoroba penajume caitorobi coyenewatha. Icha barapo coyene exanatsi naca cana exana xua wapanenebiwatsi Nacom beya. <sup>13</sup>Pomonae jopa yabara nantanuweya nanta xeinaeyo xua ichamonae peyawenaenexa tsainchi xuya Nacom bara jutiya ichane barapomonaetha. Ichitha pomonae xua yabara nantanuweya nanta xeina xua ichamonae peyawenaenexa tsainchi, xuya Nacom bara jutiya ichane po matabitha jiwi yabara paebinchi xua penatsicuentasiwa xua abe peexanaexae.

**Meje yabara xua Nacom pejume cowuntsiwichi  
pia pexeinya peexanae coyenewan tatsi**

<sup>14</sup>Tamonae pam, iru pomonae painya nejume cowuntsixae Jesucristo. ¿Eta xua metha tsipae? Metha ichun jei: Xan Nacom Pejume Diwesi

jume cowuntan, jei, ichitha jopa betiya xanepanaya exanaeyo. ¿Bara metha bapon najuntũ coyene capanepaetsipa Nacom beya? Apará jume tsipae, jopa najuntũ coyene capanepaetsipae. <sup>15-16</sup>Ichacuitha metha tsipae, metha panantausipame pomonae pejume cowuntsiwi Jesucristo painya xantha. Barapomonae metha taaibichipaetsi paparuwan xua pocotsiwa aque nexa, yawa xua taseicatsi pexaewa penabanaewanexa. Metha ichũn pon painyamonaē jiwana jiton bapomonaetha jeye: “Bara jũntema panawibiyama, paparuwa panama xatabareno, bara beta panabanareno”, jei. Daichitha bapon jopa catsiyo barapomonaetha pocotsiwa barapomonae nantawenona xua pejinompawea nexa. Baxua bapana ba ichamonae jopa yawenaetsi icha saya ba Ʃ xua paebatsi. <sup>17</sup>Barichi xua pon pejume cowuntsin Nacom Pejume Diwesi. Icha bapon jopa yawenaeyo ichũnthá pontha pon nantawenona ichawa xua pia peponaewa nexa, bapoxonae bapon pia pejume cowuntsiwa Nacomtha be cayabara jũntemaina.

<sup>18</sup>Ichacuitha jiton jeye: “Ichamonae bichocono jume cowũnta pocotsiwa Nacom itoroba bequein jopa yawenaeyo ichamonae. Seicaya ichamonae bichocono beta yawena ichamonae bequein jopa beta jume cowuntsiyo pocotsiwa Nacom itoroba”, jei. Xan ponxaein Santiago jume notsin bapontha: “Pon beta jume cowũnta jopa itacũpaetsi xua netsita exana xua bapon xaniwaicha jume cowũnta pocotsiwa Nacom itoroba poxonae bequein jopa beta yawenaeyo ichamonae. Bapoxonae xan tsita exanan bapontha xua xaniwaicha jume cowũntan pocotsiwan Nacom itoroba poxonae exanan pocotsiwa Nacom neitoroba xua poxonae yawenan ichamonae”, jan tsane. <sup>19</sup>Xam jume cowũntame xua bara compa pepa Nacom popona, xua ichũn bapocotsin aibi. Baraxua bara beta nanta xeiname. Ichitha baxua irũ caurimonae jume cowũnta yawa bichocono pijunuwi jijiyei. <sup>20</sup>Xam bapocotsim pocotsin ba jopa peyaputaēin, incane jume taema. Pon paeba xua pinae jume cowũnta pocotsiwa xua Nacom itoroba, xua daichitha jopa beta exanaeyo ichamonae nexa, bapon pia pejume cowuntsiwa bara be cayabara jũntemaina. <sup>21</sup>Nacom tsita jũntũ coyene xanepanatsi Abraham, pon wamo susatopin, pon caena bayatha tũpa. Bapon Abraham Nacom jopa tsita natsicuentisichi xua abe peexanaexae, ichitha yabara jume cowuntsiya peexanaexae pocotsiwa Nacom itoroba. Bapon pexanto isoto beya capona, petautsinexa xua petuxusi exanaenexa Nacomtha, po pexanto tatsi pewũn Isaac. <sup>22</sup>Anoxuae payaputaneme xua Abraham jume cowuntsiya exana pocotsiwa Nacom itoroba. Daxota bapon tsita itapeinya xeina xua poxonae exana baxua xua yatsicaewa bara xeina pepa pejume cowũntsi coyenewa. <sup>23</sup>Nacom exana xua caena bayatha Pejume Diwesitha jeye: “Abraham jume cowuntsiya exana pocotsiwa Nacom itoroba. Daxota Nacom tsita jũntũ coyene xanepanatsi jopa penatsicuentisixae xua abe peexanaexae bapontha”, jei

Nacom Pejume Diwesi. Barapo Nacom Pejume Diwesi tatsi xainyei, tsipei Nacom exana baxua. Daxota caena bayatha Abraham yabara jeichichi: “Apara Abraham Nacom pia jiton tatsi”, jeichichi.

<sup>24</sup>Anoxuae bara payaputaneme pocotsiwa Nacom tsita juntu coyene xanepanatsi xua jopa tsita natsicuentisichi xua abe peexanaexae pon exana pocotsiwa Nacom itoroba, jopa meisa metha poxoru pejume cowuntsixae. <sup>25</sup>Bara cana ichiru Nacom petsiriwatha powa nasi cui matacaeta pebiwitha, pia paratixichi, powa pewun Rahab, powa caena bayatha popona. Nacom tsita juntu coyene xanepanatsi barapowatha xua poxona peyawenaexae icha pebinbetha ponbe peitorobinchibe xua poxona peyantabinexabe tomara. Barapowa barapo pebinbe bupana etatsibe pia botha poxona baponbe jeitompatsibe ichamona. Bapoxona pirapaeyo bapowa baponbe capanepatsibe icha namto iya xua tomara weya. <sup>26</sup>Daxota anoxuae paca tsipaebatsi, icha pepon ba jopa xeinaeyo pejumope, ba pepon tupa. Barichi icha pebin jume cowunta Nacom daichitha jopa exanaeyo pocotsiwa Nacom itoroba bapoxona pia pejume cowuntsiwa bara be cayabara juntemaina.

### Meje yabara pocotsiwa xua peebatotha pepaebiwa

**3** <sup>1</sup>Tamona pam pomonae iru painya nejume cowuntsixae Jesucristo. Paxan pajume tan xua pinmonae painyamonae jiwana ichichipa xua penaexanaewa pomonae jiwi pecuidubiwi Nacom Pejume Diwesi. Daichitha pinmonae jopa bewa naexanae pomonae jiwi pecuidubiwi. Bayatha daxita paxam payaputaneme xua paxan pacueicueijan tsurubenaebiyon Nacom Pejume Diwesi xua jiwi jopa bewa abe exanaena. Daxota poxona baxua pacueicueijan xua daichitha abe paexanan bapoxona Nacom bichocono pana peraxa jubina beyacaincha xua poxona bapon cana exanaena ichamonaetha. <sup>2</sup>Daxita waxainchi ichichipatsi nawita xua abe waexanaewa. Anoxuae payaputaema, icha ichun jopa abe exanaeyo xua poxonae paeba bapon jame penthuthu yapu xanepanaein. Matautano bapon itacupatsi xua najuntu coyene itoroba daxita pia pepontha xua xanepanaya peexanaewa abe peexanaeyainwa. <sup>3</sup>Poxona waxainchi cawayu wano atatsi penainto xua wanaca cui jejeinexa baraxua apara xua wacafebabinexa daxita pepon ichaxota waponaewa. <sup>4</sup>Barichi payabara nanta xeinare jera po nae pin nae. Bara bequein bichocono pin nae yawano bara bequein po joibo pin joibo capubabiya tsaibi, daichitha pon tafecaeca bapon cafebabecapona ichawa beya xua ichaxota ichichipa peponaewa xua xoyotha tsiwiyo tsecae xoyo ira werucueina. <sup>5</sup>Icha jera ichi po nae pin nae xua dapocotsiwiyotha cafebabecapona, barichi peebato xua dapocotsi ebatiyoy tsecae pepon nexa. Daichitha barapo ebatiyoytha itacupatsi xua yabara eetaponaeya paeba pia peexanaewa poxonae ichamonae aebatsi. Barichi unu itacupatsi

xua petaxuiwa dacotsi iteretiyotha. <sup>6</sup>Icha nawa iteretiyo cana ichi unu, peebato bara ichiya exana daxita coyeneintha. Bequein waebato peyauyo tsecae xua wapepon jiwana xua pin xaintotsi, ichitha bara itacupcatsi xua bichocono abe exanatsi naca cana exana. Waebato naca cana exana xua waexanaewa daxita abe waexanae cuiru coyenein xua poxonae wacueicueijeixae waebatotha xua caurimonae pia pentacaponaein tatsi wanaca cui itorobixae. <sup>7</sup>Jiton ba itacupatsi xua ita coxone exana daxita duweimonae, pepupunaewi, jomon yawa menepipichiwanno. Daxita baxua i daxua jiton ba ita coxone exana. <sup>8</sup>Nama peebato jopa be baraichichi. Jopa wanaca yapu xanepanaewa xua waebato cuidubatsi xua jopa abe jume pepaebiwa tsane. Waebato bichocono abe tsecae. Itacupatsi xua jiwi cana exanatsi xua ichamonae pejumetaya anthuthutanewa, icha jomo ichi xua jiwi ba atene exanatsi pewanotha xua ichacuitha ba jiwi tupa exanatsi xua pewano tsapa pexeinaexae. <sup>9</sup>Barapo ebatotha wuna jaintatsi Nacom pon Waxa. Matautano abe yabara paebatsi pebiwi barapo ebatotha. Ichitha barapo pebiwitha Nacom caena bayatha forota daxota barapo jiwi pia juntu coyene tatsi jupa icha Nacom pia juntu coyene tatsi ichi. <sup>10</sup>Matautano barapo coibototha jume pichapa xua wuna pejainchiwa Nacomtha, xuano xua abeya pepaebiwa. Tamonae pam pomonae iru painya nejume cowuntsixae Jesucristo. Jopa bewa barapocotsi coyenewa paexanaem xua poxonae Nacom wuna pajaintame xuano xua jiwi abe payabara paebame. <sup>11</sup>Po mera natsibotarucua ira buxupana wetsina, poxonae mene jujuina barapoxonae caena yawa jopa muxuna jujuinaeyo po mera xeica yawa po mera atsaxa. <sup>12</sup>Tamonae pam bara pocotsi juta coyeneya ichi poxonae waxainchi ubatsi. Higuera nae jopa ba nacoichiyo olivo nae thei, po pethei aceituna thei matawun. Yawano uva unbototha jopa ba nacoichiyo higuera nae thei. Barichi barapo mene po mera mene natsibotarucua poxonae mene jujuina barapoxonae caena yawa jopa muxuna jujunaeyo po mera xeica yawa po mera atae. Barichi waebatotha jopa bewa xeinaetsi ainya jume coyenewabe po jume wuna yawa po jume abe.

### **Meje yabara xua pepa pexainyeiwa xua peyaputae coyenewa**

<sup>13</sup>Icha painya xantha popona pon bichocono peyaputaein xua yawa pecoxonaein bapon bara bewa moya xanepanaya beta poponae yawa bara bewa moya ita ururaquiya poponae. Beta peexanaexae jiwi peitutha, bapoxonae jiwi tane xua bara bapon pon bichocono pepa peyaputaein. <sup>14</sup>Metha painya juntu coyenetha paxeiname peuwiwa xua paca juntu coyene atsaca exana ichamonaetha. Yawa metha painya coutha pana nata exaname painyawan pia jiwi wuna paca yabara paebichi xua pia ainya cui paca exanaetsi xua beyacaincha ichamonae. Icha paxeiname barapo peyaputae coyenebe bapoxonae painya xoba paeabame ichamonae



painya pepa neyaputae jiwi pamxaem. Poxonae baxua papaebame apara saya panaerabame xua jopa paxainyam. <sup>15</sup>Apara barapo peyaputae coyene xuaunxuae po peyaputae coyene yabara paca tsipaebatsi barapo coyene apara jiwi nanta xeina barapo cae pin nacuathe pomonae jopa pejume cowuntsiwi Nacom. Barichi barapo peyaputae coyene cauri nanta xeina. Apara barapo peyaputae coyene Nacom werena jopa ponaeyo. <sup>16</sup>Daxota poxonae ba jiwi pejume uwiwa xeina ichamonaetha yawa ɯ penata exanae coyene piawan bapoxonae ba jiwi jopa xanepanaya penanta xeinaewa yawa exana daxita abe peexanae cuiru coyenein. <sup>17</sup>Nama pomonae xua peyaputae coyene xeina xua po peyaputae coyene Nacom werena pona, barapomonae copiya jüntu coyene xanepanaya jinompa yawano barapomonae jopa naita aenae-aeneyo saya jüntema pejinompaexae. Yawa barapomonae yabara jume baru cui itura jina pocotsiwa ichamonaetha paeba. Yawa jume jejei xua peexanaewa pocotsiwa ichamonaetha itoroba. Matautano nantanuweya yabara najüntu coyene xeina peyawenaenexa tsabi tsane ichamonaetha. Matautano barapomonae wunaeya xanepanaya exaneiba ichamonaetha nexa xua jopa ichawa beya nanta xeinaeyo xua saya xaniwaichiya exana. <sup>18</sup>Pomonae xua bichocono ichichipa xua jüntema pejinompaewa barapomonae cana exana ichamonaetha, xua ichamonaetha jüntema jinompa xua daxota barapo ichamonaetha bichocono xanepanaya betiya exana dubenanaebiya.

**Meje yabara pomonae ichichipa naexana pomonae  
jopa pejume cowuntsiwi piamonae tatsi**

**4** <sup>1</sup>¿Eta werena pona barapo coyene xua pana najume matsontsonobame? ¿Yawano eta werena pona barapo coyene xua pana nabame? Apara barapo coyenebe naforoba painya jüntu coyeneintha ichaxota paichichipame xua abe painya nenanta xeinaewa. <sup>2</sup>Ichawa paichichipame ichitha jopa paxeinaem daxota ichun anaya pabexubame. Ichawa payabara cui uwame, ichitha jopa paca itacupaeyo xua paxeiname daxota anaya pana nayabara bame. Jopa paxeinaem pocotsiwa paichichipame tsipei Nacomtha jopa pawucaem. <sup>3</sup>Poxonae Nacomtha payabara wucame pocotsiwa paichichipame, jopa Nacom paca catsiyo tsipei jopa xanepanaya pawucaem, saya painya nata wucaexae pocotsiwa xua abe painya neexanaewa tsane. <sup>4</sup>iMaisa paxam caurimonae pia pepuna jinompaewichi pam! Payaputaneme xua pomonae ichichipa naexana pomonae jopa pejume cowuntsiwi Nacom piamonae tatsi, barapomonae apara ba Nacom peaitafaetabiwichi. Daxota poxonae paichichipame xua panaexaname barapo cae pin nacuamonaepiwi piamonae tatsi, apara panaexaname Nacom pia peaitafaetabiwichi tatsi pam. <sup>5</sup>Daxota Nacom Pejume Diwesi jeye: “Nacom asiwiya antobe po jumope tɯnaxɯ naca cayawa exanaeya jinompa exana”, jei. <sup>6</sup>Ichitha Nacom pia peantuyarusuwatha naca yawena xua jopa abe waexanaewa tsainchi. Nacom

Pejume Diwesitha jeye: “Nacom jopa yawenaeyo pomonaetha pomonae jiwi peabiwi. Ichitha pia peajuntuyapuswatha yawena pomonaetha pomonae ita ururanaya jinompa xua jopa atsaquiyo”, jei. <sup>7</sup>Pajume jejande xua Nacom paca itoroba yawa paexande. Jopa pamuxu jejande cauri pia pentacaponaein tatsi xua paca tsipaeba. Bapoxonae bapon naetsiricuaena painya xainya weya. <sup>8</sup>Nacomtha patsipaebare, bapoxonae Nacom paca yawenaena. Paxam pomonae abe peexanae jiwi pam, tsipei Nacom paantobem yawa pamuxuna antobem po peabe exanae coyenewa barapo cae pin nacuathepiwi exana. Bara panacui barapende barapo abe painya exanae coyene. Yawano Nacom patsita najuntũ coyene xanepana exande. <sup>9</sup>Abe painya neexanaexae, pana najuntũ coyene acaurande, pawecoyande, yawa panantũ exabare. Poxonae pajuntũ coyene weiweiname xua painya neexanaexae pocotsiwa barapo cae pin nacuathepiwi exana, bara equeicha caewa pajuntũ coyene wecoyande xua painya neuraxae. <sup>10</sup>Nacom pon jiwi Pecanamataxeinaein pabarũ cui itura jinare xua jopa ainya cui pana nacana exanaem. Bapoxonae Nacom ainya cui paca cana exanaena.

**Meje yabara xua jopa bewa ichamonae yabara paebichi  
tsainchi xua penatsicuentsiwa xua abe peexanaexae**

<sup>11</sup>Pomonae painya nejume cowuntsi jiwi pam Jesucristo, jopa bewa ichamonae yabara paebichi tsainchi xua penatsicuentsiwa xua abe peexanaexae. Pon abe yabara paeba pontha pon Cristo pejume cowuntsindũ, bapon muxuna abe yabara paeba Nacom pia peitorobi diwesi. Bapon jopa jume cowuntsiyo pocotsiwa xua barapo diwesi itoroba xua pinae jopa bewa abe yabara paebichi ichũn xua xeina penatsicuentsiwa xua abe peexanaexae. Bapoxonae bapon natsicuenta Nacomtha barapo coyenetha tsipei abe paeba nawita. Poxonae bapon abe yabara paeba Nacom pia peitorobi diwesi bapoxonae bapon be jopa exanaeyo po coyene Nacom pia peitorobi coyenewatha itoroba. <sup>12</sup>Apara meisa bapon Nacom pon naca cata pia peitorobi coyenewa. Matautano bapon compa pon jiwi peyabara paebin xua penatsicuentsiwa xua abe peexanaexae. Meisa saya bapon itacupatsi xua jiwi capanepatsi pia nacuatheicha, xua ichacuitha ba jiwi itawetatsi pia nacua weya xua abe peexanaexae. Nama paxam apara jopa paca itacupaeyo xua payabara paebame xua ichamonae pia peexanae coyenewa tatsi. Matautano jopa paca itacupaeyo xua jiwi pacapanepame Nacom pia nacua beicha tatsi, xuano xua jiwi ba ichacuitha paitawetame Nacom pia nacua weya tatsi abe peexanaexae.

**Meje yabara xua cataunxuae jopa nayaputaeyo  
pocotsiwa xua baya nexa tsane**

<sup>13</sup>Anoxuae pajume taema xuaje, xua paxam ba pajam: “Anoxuae, ichacuitha icha jopa anoxuae tsipae, baya tsane paponaein icha

tomaratha. Ichacuitha icha jopa barapo tomaratha tsipae, paponaein icha tomaratha. Baxota pata tha cae wei yapu othopaetsi, pata caenaeta dubenanaebiyaetsi, yawa pata paratixi caetuba dubenanaebiyaetsi”, xua pajam. <sup>14</sup>Jopa baxua pananta xeinaeinde tsipei jopa payabara yaputaem pocotsiwa baya painya nejinompaewa tsane. Barapocotsi juta coyeneya pana natsicotaneme, icha nobo ichi, xua ba caeto nobo tsuncuae equeicha caewanaya. Barichi jiwi bara caeto jinompa, equeicha werapa. <sup>15</sup>Jame bewa pocotsiwa papaebim xua jeye: “Icha Nacom pon jiwi Pecanamataxeinaein ichichipa xua wajinompaewa, moya jinompaeinchi, yawa exanaeinchi pocotsiwa xuaje, ichacuitha xua ichawano”, xua bewa jei. <sup>16</sup>Ichitha nama paxam, jopa baxua papaebim pocotsiwa icha Nacom ichichipa. Saya paaebame poxoru paichichipame xua painya neexanaewa pocotsiwa painya coutha paichichipame. Icha poxona paichimje xua poxonae paaebame bapoxonae bara apara abe peexanae cuiru coyene paexaname. <sup>17</sup>Pon xua yaputane xua beta peexanaewa, xua daichitha jopa baxua exanaeyo, apara bapon bara abe peexanae cuiru coyene exana.

**Meje yabara xua pemuxuwetsi coyene pomonaetha  
pomonae copei pexeinaewi**

**5** <sup>1</sup>Pomona copei pexeinaewi pam, pajume taema xuaje: Payabara siwa wecoyande yawa pana nantanuweya namtsebare xua painya nepaca tsita jopaexae pocotsiwa xua jopa xaexaenaecaeyo, pocotsiwa xua paca atene exana. <sup>2</sup>Daxita xua xuan paxename baxuan daxita tsabana, yawa painya pexeinya pabuburun xua pemu itane wunaewan baxuan daxita ofon xane. <sup>3</sup>Painyawan xua pocotsiwa pewun oro nain yawa xuano pocotsiwa pewun plata nain, daxita baxuan tasibounatsi. Baxua paca tsita naitapeinya xeina xua paxam jopa pacatsim ichamonae saya asiwiya pantaroepicha xexeinaponame barapo copei. Barapo copei pajebame anoxuae. Ichitha po mataqueitha poxonae Nacom yabara paebina jiwi xua penatsicuentisiwa xua abe peexanaexae bapontha, barapo matabi imoxoyo tsane. Nacom weraweraca exana barapo copei xua painya copei, icha isoto ichi xua tauta exana xua topowa. Bichocono copei pacaetubame bequein jopa baxua paca yawenaeyo painya nepanenebiyaewa po mataqueitha nexa po mataqueitha Nacom yabara paebina pocotsiwa jiwi pia peexanae coyenewan ichacuitha xua metha wnae, ichacuitha xua metha abe. <sup>4</sup>Jopa pantomatsim pomonaetha pomona pacata nacuita poxonae pacata naweta pexaewa. Painya caibixae barapo pentoma barapomona paca yabara namtsebiya wawai. Yawa Nacom pon jiwi Pecanamataxeinaein, pon daxita pia peitorobi coyene pexeinaein bapon daxita baxua jume tane xua barapomona namtsebiya wawai. <sup>5</sup>Barapo irathe bichocono copei

paxeina dubenanaebiyame, matautano paexana dubenanaebiyame pocotsiwa xua paca jũntũ coyene weiweina exana. Bichocono copei paacabem po mataqueitha poxonaē Nacom paca jutebina, icha jiwi ichi xua natsixuruwei naxinyaba exana vaca xua bexa pebexubinexa tsane. <sup>6</sup>Paxam pomonaē copei pexeinaē jiwi pam abe payabara paebame pomonaē pejũntũ coyene xeicaē jiwi. Yawano pajutebame barapomonaē, bequein jopa itacũpaetsi xua pia coutha penayawenaewa.

**Meje yabara poxonaē Santiago jei: “Jopa paaitaconaeinde poxonaē bequein ichamonaē abe pacata exana”, jei**

<sup>7</sup>Tamonaē pam pomonaē irũ Jesucristo painya nejume cowũntsixaē. Beitemaya pawũnaē eware pon jiwi Pecanamataxeinaēin, pon Cristo. Jopa paaitaconaeinde poxonaē pawũnaē ewatame xua poxonaē bequein ichamonaē abe pacata exana. Barapo coyene baxua bara paichinde, icha pon pabi pexeinaēin ichi poxonaē beitemaya ewata xua naweta xua naxainwaeta. Bapon jopa aitaconaeyo poxonaē beitemaya ewata xua ema taatsanaēinchi pia pabi. <sup>8</sup>Paxam irũ bara paichinde. Jopa paaitaconaeinde poxonaē pawũnaē ewatame pon jiwi Pecanamataxeinaēin. Pana najũntũ coyene tsacabare xua jũntema painya nejĩnompawea tsane, tsipei pon jiwi Pecanamataxeinaēin bara nama imoxoyo pewũnaeyo tatsoponaetsi xua pepatopawea.

<sup>9</sup>Tamonaē pam pomonaē irũ Jesús painya nejume cowũntsixaē. Jopa caemonaē nantiya aitaconaeya pana nayabara paebinde xua abe painya nenata exana dubenanaebiyaexaē. Icha baxua paexaname paxam panatsicuentame Nacomtha tsipei Nacom pon jiwi peyabara paebin xua penatsicuentsiwa xua abe peexanaexaē. Nama imoxoyo tsoponaē poxonaē Nacom itorobina xua jiwi peraxa jũbebinchi pomonaē abe peexanaewi.

<sup>10</sup>Tamonaē pam matha pataema po diwesi yabare: Pomonaē Nacom peitorobi jume pepaebiwi pomonaē caena bayatha jinompa, barapomonaē bichocono atene exanatsi ichamonaē. Bequein bara barapomonaē atene, daichitha awiya jopa aitaconaeyo poxonaē abe taexanatsi ichamonaē. Awiya barapomonaē pomonaē Nacom peitorobi jume pepaebi jiwi ba cueicueijeji tsaibi Nacom nexa, pon jiwi Pecanamataxeinaēin.

<sup>11</sup>Waxainchi ba yabara nanta xeinatsi barapomonaē, xua bichocono jũntũ coyene weiweina poxonaē beitemaya awiya jume cowũntsiya exana dubenanaebiya poxonaē bequein abe taexanatsi ichamonaē. Bayatha caena pajume taneme xua pinaē pon pewũn Job jopa aitaconaeyo Nacomtha poxonaē bequein Nacom yaperaxaeya jume cowũnta ducuaanaebiyatsi. Matautano payaputaneme xua Job equeicha matapainya beta taexainchi Nacom, pon jiwi Pecanamataxeinaēin tsipei Nacom jiwi nantanuweya peyabara nantũ coyene xeinaēinchi xua jiwi peyawenaenexatsi.

<sup>12</sup>Jame xuaje ainya cui: Jopa Nacom pawun caunutsinde xua bapon painya nepaca taewa tsane xua xaniwaicha painya nepaebiwa poxonae yabara pana natsiwana wunae paebame ichamonaetha pocotsiwa bexa painya exanaetsi. Poxonae pajam: “Je”, pam, bara bara paichinde. Poxonae pajam: “Bara”, pam, bara moya bara jopa paexanaeinde. Bapoxonae jopa Nacomtha panatsicuentisim tsane abe painya neexanaexae. Barichi jopa itaboco pawun caunutsinde, yawa irano jopa pawun caunutsinde, matautano jopa icha wunno pawun caunutsinde.

<sup>13</sup>Icha ichun pon painyamonaе jiwana jiton ajuntucoyenetane xua abe petaexanaeаetsi ichamonaе, barabu bewa bapon Nacomtha wucaena xua peyawenaewa tsainchi. Icha ichun juntu coyene weiweina, barabu bewa bapon peweixi naxnae xua Nacom wunae jainchiya peyabara naxnaewatsi. <sup>14</sup>Icha ichun atene, bewa pawabim penapatae jiwi, pomonaе pecanamataxeinaewi xua canamataxeinatsi pomonaе Nacom pejume cowuntsiwi. Bapoxonae barapomonaе bewa tawucaena xua pon peatenein petawucaewatsi xua Nacom axaibi peexanaenexa. Bapoxonae barapomonaе bewa juinya penasiwatha mata caxuebina Cristo pewuntha pon jiwi Pecanamataxeinaein. <sup>15</sup>Poxonae barapomonaе Nacomtha wuca bewa yabara jume cowuntsiya wucaena xua bara Nacom pon jiwi Pecanamataxeinaein axaibi exana bapontha. Bapoxonae pon atene jume tsane. Matautano pon Wanacanamataxeinaein, bapon pon atene axaibi exanaeinchi. Icha pon atene abe peexanae cuiru coyene exana baxua Nacom cayabara juntemainaena. <sup>16</sup>Daxota paxam, caemonaе nantiya pana natsipaеbeibare xua poxonae abe nantiya pana nata exaneibame, pajam tsaibinde: “Pin uran, yaitama jopa xapain cata exanaetsi necayabara juntemainare”, pajam tsaibinde. Pon Nacom peitabaratha tatsi juntu coyene xanepanaya popona, poxonae bapon Nacomtha wuca bichocono peayapuswa xeina xua daxota Nacom beta cana exana bapontha. <sup>17</sup>Nacom peitorobi jume pepaеbin Elías, bapon bara jiton bara wanaca cui jupaein, pon caena bayatha popona. Poxonae bapon Nacomtha matowa wuca xua jopa peruneicaewa tsane, bapoxonae jopa duneicaeyo tres po weibe yawa equeicha bara caeto nama. Bapoxonae barapo nacuatha pin jainbo nacia tsurucuae. <sup>18</sup>Bapoxonae, poxonae equeicha Nacomtha wuca, bapoxonae equeicha duneica yawa pexuwiwan xanepanaya nawetsiya xuwa.

<sup>19</sup>Tamonaе pam metha ichun pon paxam jiwana abe exanapona bequein yaputane xua bewa exanaena pocotsiwa pexainyeiwan. Icha ichun yawena bapontha xua equeicha caewa beta peexanaewa tsane bapon, pon yawena, bara beta exana. <sup>20</sup>Pon yawena bewa yaputaena xuaje: Po jiton xua cana exana ichamonaе xua penacui barapentsiwa abe peexanae cuiru coyenein, xua equeicha pejume cowuntsinexa Nacom, barapon juntu coyene capanepa exana barapomonaе petupae cuiru coyene

weya. Matautano bapon jũntũ coyene yawena xua Nacom peyabara  
jũntemainaewa xua barapomonae abe pia peexanae cuiru coyenein tatsi  
xua bequein bichocono nawita.

Baja Santiago.